

戶部則例

漕運三



戶部則例

漕運三

一計屯貼運○直隸通州天津各所屯地每軍



派給五十畝其通州所原存地畝未足者將天津閑地撥補○山東德州衛屯地每軍均派四頃七畝七分零輪流耕種每歲除納正項錢糧外每畝公出銀二分一毫津貼運軍德州左衛撥德州衛屯地五百七十一頃三十二畝零給軍貼運其地仍歸德州衛承種每畝除正項錢糧外津貼左衛運軍銀二分七釐濟寧衛每船

派給贍運田五頃四十畝任城衛每軍額派起科地七十六畝零輪流承種濟運東平所每船給地五頃自為開墾以作贍運免其起科平山衛每船派給贍運地二頃四十五畝不等東昌衛每船派給贍運地五頃臨清衛每軍原贍地五十畝或二三十畝不等皆分派濟運又德州所屯地按軍派給錢糧不徵不解坐抵安家月糧之用每船該地四頃五畝零濮鄆等州縣每船給地三頃以資贍運○江南江安糧道所屬江寧等衛原編屯丁運戶兩頃其屯地照畝納

糧額供兵餉運軍給以行月錢糧不給屯田安慶衛每軍授田五百二十餘畝分為上下兩運新安衛屯田額徵銀五千一百十有六兩二錢四分有奇勻派給軍凡幫貼散戶不論軍民管佃每年每畝津贍銀一錢宣州衛每船派田千四百二十二畝零歲津運銀百四十兩有奇續又每畝加津貼銀三分建陽衛每軍舊給額田四十畝今以實在田數分別等次均勻盡派無分屯軍運戶按船授田輪流領運廬鳳淮徐等衛屯田均係分別等次品搭均勻給軍贍運其

民種軍田者按畝津貼蘇松糧道所屬蘇松等衛所屯田分上中下三等各照領運船分別給軍○浙江各衛所屯田每船均給百有二畝八分六釐零計屯起運凡有屯領運衛所即以原額田津派本衛所應運之船其派剩屯田分別等次津貼有運無屯衛所按船派給至有屯無運衛所田畝徵租解道照則貼派無屯衛所之軍○江西各衛所屯田照各衛原額漕船及屯軍數目均勻派撥每船編撥屯田六百二十九畝募佃耕種令佃戶完糧之外每畝每年運軍

收租銀八分其民墾成熟轉售賣者除完正課外照民田則例按畝折徵解道津貼本衛所運軍其有減存之船將該船應得屯田地畝租息除完糧外所餘租籽折價歸公○湖北湖南各衛所屯田按畝科糧給軍其運弁俸薪等項并軍三小料及運軍安家糧銀均於屯田內照數徵解支給○乾隆二年奏準各省屯田如有佃種不清者自應一并清理但民間相沿日久必須辦理妥協方無煩擾應令總漕各該省督撫酌量辦理○又題準湖南長沙等三十七州縣

統計開丁千八百九十五名每丁徵銀二錢共  
徵丁銀三百七十九兩因各丁內有無產窮丁  
無力完納議令照依人丁匠班之例攤入各州  
縣地糧徵收○三年

諭朕思惠養斯民之道以輕徭薄賦爲先凡各省田  
糧偶有些微偏重之處悉已陸續豁免以舒民力  
今安徽所屬懷遠衛軍田十三頃每畝徵銀八分  
八釐零較之民田未免稍重著照蒙城縣民田之  
例每畝徵銀二分一釐有奇共免銀九十八兩八  
錢七分又武平衛軍田五千二百九十一頃每畝

加徵銀七釐三毫有奇除見在請禁衛田之私典  
等事案內每畝應留贍運銀一釐七毫外每畝著  
減去加徵銀五釐五毫有奇共免銀二千九百六  
十二兩六錢五分該部即遵諭行文該督撫從乾  
隆三年爲始永著爲例欽此○五年奏準屯田租  
與民人耕種該運軍止許得當年租銀如加別  
年租銀立券私交者照私典軍田例與受均行  
治罪其田追入新運之軍租價入官○又題準  
浙江温州衛屯田三萬一千二百三十四畝內撥  
派本衛二幫田萬六千二百九十三畝該衛各

軍均交親屬管收外其餘田萬四千九百四十畝找派寧紹處三衛之軍從前原因相隔遙遠未經執業未幾又值兵燹屯民墾熟爲業以致軍民爭訟今議定按照上田一畝收穀三石中田二石下田一石六斗各半平分之數輸津給軍其佃戶輸津完餉之處令該衛徵比該管府道催徵分別解餉給軍衛備徵解不前照例叅處佃戶不能完納別召良佃耕種私自典賣者治罪○又題準各省屯田徹底清查將實在數目造具清冊送部倘不實力奉行該督撫一并

題叅○八年題準湖北武昌等衛所屯田清出原額有屯清屯無屯清費每年德安所額船三十三艘每船得幫銀百六十二兩襄陽衛三十船每船給銀百七十兩武昌衛五十六船武左衛五十五船每船得銀百四十七兩三錢黃州衛二十六船每船給銀百二十五兩蘄州衛三十二船每船給銀百三十五兩各有奇○又題準湖北荆左衛成熟并新墾升科屯田二千二百五十五頃八十五畝零荆右衛成熟運操屯田二千二百二十五頃三十二畝零沔陽

衛屯田千九十六頃三十畝零。又軍操田八十四頃零。荊州左右中前後五所屯田六百十二頃十四畝零。操田千三百十有五頃五十八畝零。應令運軍及民佃。照糧一體軟抽。凡軍田典賣在民及頂絕墾荒年久。造有房屋墳墓。願當軍差者。即將本人編入軍戶當差。軍置軍產田。差均去者。亦準其當差管業。其田不準回贖。如民買軍田不願當差。及軍買軍產田去差存。而原戶貧乏不能回贖者。分別津貼以資贍運。○九年題準江西屯田。清出原額新增田地。基山。

塘堰除豁除坍塌外。見在成熟者五千三百三十七頃七十八畝零。內南昌前左。撫州鉛山。饒州等衛所隨田地。基山塘堰。并建德縣補軍屯田。鉛山所運軍隱匿入官屯田。袁州屯田。塘五百七十六頃六十畝。不徵餘租。九江廣信鉛山等衛所成熟屯田二千四百二十七頃七十五畝。零應徵餘租。軍丁利於自取贍運外。其南昌等衛所軍民管業屯田二千三百三十三頃四十二畝零。每畝派徵餘租不等。每年徵租銀九千五百九兩有奇。吉安所坐落龍泉縣丈出餘

屯改升民田六十一畝每年徵租穀折價銀四十兩九分有奇均由縣徵收解道轉給各衛所運軍均分濟運○十年題準山東衛所屯田除東昌濮州東平三衛所並無什軍分種均係見運之軍執業外其濟寧臨清平山三衛所地畝什軍一體領地一軍駕運九軍津貼臨清衛貼運山東前幫河南前後兩幫每年每畝津銀三分濟寧衛貼運濟寧前後兩幫按地定肥瘠照收成分數折給東昌衛之平山前後兩幫每年每畝津銀八分其典賣地畝逐漸贖回歸輪運

之軍亦令同贖田租輪收嗣後敢再典賣與受一并治罪追田給運典賣地內葬有墳墓者酌給畝數永行津貼什軍應贖地畝未贖之前應令一例津運各幫永減船及閑運軍田內有糧地畝每年每畝津銀八分以二分完糧六分津運每歲津銀令各衛彙齊按原減原歇幫次勻給見運各軍久荒屯田軍民費本開墾者給照執業議津每年每畝津銀六分以二分完糧四分津運○又題準浙江屯田除康熙二十五年裁減駕軍田畝外按各衛所出運千四百四十



一船每船給田百有二畝八分六釐零運軍有能自行執業者即令運軍完餉收租有因田坐遙遠以及零星硤瘠不能自行執業者歸屯佃管辦即令屯佃完餉輸津贍運其津銀數即照依地土隨時酌定令衛所印官徵解給軍○又題準德州正左二衛贍運屯田坐落直隸山東二省從前原係軍民承種貼租各軍自討襄運或有或無有名無實今清出地二千四百二十九頃零每年每畝以一分起租共銀二千四百二十九兩有奇分給運軍五十六名每名年給

銀十兩什軍五百四名每名年給銀三兩七錢有奇如隸本衛者由衛徵租如隸直隸者每年造冊咨直督轉飭州縣代徵關解衛備一例分給各丁承領任城幫四十七船並無額產仍照向例每船每年給贍軍銀十兩於地丁內動給彙入漕項奏銷○十二年題準各省贍運屯田典賣與民照例備價回贖由衛所移明州縣飭令民人收價退田倘地方官不即飭退即將該州縣照承辦遲延例叅處如該軍不即備價妄控退田以及一時草率不行詳察旋即更正者

將該衛所官弁罰俸一年。若實係民田，故作軍田捏報詐冒者，將該衛所官弁降一級調用。倘各衙門書識人等有隱占屯田情弊，該管官弁均照失察衙役犯贓例議處。該役照侵盜官糧例治罪。○十三年題準：湖北、荆右、沔陽三衛有貧乏赤丁，按照原派輸幫銀數減免幫貼，其枝彛長遠四所既隸荊州衛，其舊存成熟田地千二百頃十畝零，改照民田起科。雖非運產，究屬同衛運軍，亦令津貼，以重漕運。

一、優恤運軍：康熙二十年議準，漕船凍阻，將通

濟庫銀借給，仍令總漕將應給漕贈銀照數扣解補還原項。○三十五年題準：江淮興武二衛漕船凍阻不能回南，動支通濟庫銀，每船給銀二十兩，速催回次，仍令總漕於漕贈銀內扣解還欸。○四十六年議準：各省領運運軍限內過淮抵通，照數全完者，令總漕賞給花紅，以示鼓勵。如抵通交糧於額糧之外，有領運三年陸續多交米至百石者，倉場咨部註冊領運六年多交米至二百石者，給以九品頂帶榮身。如有運軍運米至二十年，雖無多交之米，並無挂欠，及過犯事故者，倉場侍郎咨

部亦給以九品頂帶榮身○六十年議準漕船回空凍阻暫動東省藩庫銀每船借給八兩於六十年各該糧道應給運軍月糧內坐扣移解東省還項○又議準到淮各幫漕船因雇募民船諸費浩繁借給河庫帑銀作民船口糧水脚之用江安漕船每船借銀五十兩蘇松漕白船每船借銀四十兩江西漕船每船借銀三十兩浙江漕白船每船借銀五十兩均于次年運軍應領行月銀米內扣還○雍正元年議準各省完糧各軍并守凍完糧軍船每船正軍一名賞給銀二兩又山東張秋

臨清一帶地方浙江江西江南等省幫船運軍頭舵工等守凍不能回次量支藩庫銀四千兩每船給銀六兩○六年奏準回空漕船過淮安關頭工舵工水手人等零星稍帶梨棗六十石以下者免其報稅其餘貨物仍照例僉量按貨納稅經許墅關稍帶梨棗及應行上稅之物仍令輸稅○七年

諭運軍駕運辛苦若就糧艘之便順帶貨物至京貿易以獲利益亦情理可行之事著於舊例六十石之外加增四十石永著爲例欽此○八年題準各船頭工

舵工二人。每人準帶土宜三石。水手無論人數。每船帶土宜二十石。合算每船準帶土宜共百二十六石。○九年議準。河東二省。截留存剩漕米三十萬石。議令原船運通。挽輸上下。倍爲勞苦。按道里之遠近。時日之多寡。酌議在德州往返者。每船給銀二十八兩三錢八分。在臨清往返者。每船給銀三十九兩三錢五分有奇。共四百十有九船。應給銀萬四千九百四十二兩一錢有奇。再在德州往返各船。先經兩次借給。每船共銀三十八兩。今每船多給銀九兩六錢。

二分有奇。共多給銀千三百五十六兩一錢六分。免其扣追。○十三年

諭。湖南明歲應運漕糧。已經截留。爲黔省振恤之用。定例漕船停運之年。給運軍一半月糧。以爲養贍。朕思各船水手。均由運軍雇募。多係別省貧民。今湖南漕運既停。各水手等。在異鄉之業。未免歸費無資。著湖南巡撫。於本年回空漕船抵次之日。就近驗明各水手內有別處民人。即量給回籍盤費。資助伊等。令回原籍。勿令逗遛滋事。欽此。○乾隆三年。奏準。回空漕船舵水人等。零星稍帶梨棗六十石。免其輸稅。

○四年題準各省重運糧船例帶土宜百二十  
六石向因各項貨物粗細不同按石計算漫無  
一定嗣後分別貨物粗細酌量捆束大小定數  
作石於過淮處立榜曉諭如有違例裝載以及  
書役人等稽延勒索嚴加究處○七年奏準安  
徽蘇松浙江三省截留漕船於定例停給一半  
月糧項內再照浙例減半賞給○又

諭今年漕船北上時值河水淺涸各船盤駁加緯繁  
費實多借支庫項以作歸途使用江西南昌等幫  
借銀四千四百兩江南興武等幫借銀千七百零

四兩揚州等幫借銀千七百九十二兩均著加恩  
賞給免其扣還欽此○十年奏準首進幫船每年  
五六月間回空之時尚無梨棗可帶以致不能  
均沾利澤嗣後回空糧船行至山東如無梨棗  
可帶準其將核桃瓜子柿餅等物攜帶六十石  
以抵梨棗之數倘逾六十石者按則徵收稅銀  
○十一年

諭停運漕船例給一半月糧以資苫蓋上年兩江被  
水朕降旨蠲緩并截留漕糧以備振恤之用其減  
歇軍船自應照例支給但念該地方被災之後軍

力未免艱難一半月糧虞不敷用著加恩於常例五  
分之外增給二分俾窮軍不致拮据欽此○十三年  
諭本年四月初間湖南江西運艘於桃源宿遷地方  
遭風沉溺重船五十艘所有虧折米數例應運軍  
買補其船亦應賠造但念窮軍力量艱難若令一  
時賠補難免拮据著加恩軫恤其船已滿年限者  
照例給價成造未滿年限者於道庫內借給令其  
及早成造限以三年陸續還款以紓軍力至此次  
失風實非人力踈忽所致運官及汎地各官均著  
免其處分欽此

一徵收禁例順治九年題準運軍行糧應給本  
色有違例折銀者縣官與運弁均嚴提究擬○  
十二年題準兵道知府職不司漕有借驗糧名  
色苛索者官即指叅胥役究治○十三年奏準  
漕糧開徵之時如有州縣蠹役包攬代完及飛  
派無辜者即行指叅○十五年議準州縣拖欠  
漕項錢糧該管監兌糧道等官嚴檄行催不得  
差役致滋勒索違者指叅○又題準運軍子弟  
及積年舊役有謀充有漕各衙門書承者令總  
漕并督撫嚴察從重治罪如本官失於覺察

及狗庇容隱者分別叅處○十六年題準州縣徵收漕米浮派雜費及僕役經承需索小民常例者嚴行禁止犯者題叅究治○康熙元年題準徵收糧米責成印官稽察不許顆粒囤貯私家如紳衿大户仍囤私家不行交倉者管糧官詳報總漕題叅○四年題準各州縣徵收漕米如有淋尖踢斛剗削斛底改換斛面及別取樣米并斛面餘米者總漕各督撫嚴察題叅○三十年題準州縣官侵隱漕項銀捏稱民欠冒請蠲除者題叅治罪其失察之該管上司交部議

處○又題準州縣經承盜賣漕糧依律治罪失察之本管官照例議處○三十三年題準漕糧耗米例應徵收本色給軍如有私自改徵折色者各該督撫題叅照私自改折漕糧例議處○五十一年題準州縣兌糧責令監兌官坐守糧道親到水次稽察倘有折收情弊發覺將該管州縣及領運官均革職監兌官降二級調用糧道降二級留任所折米石照數追賠

一重運禁例順治五年題準運官奉單領運赴次違限者革職戴罪交糧覈其完欠奏奪僉

運退避者。嚴拏究擬。○十年題準。領運弁軍中  
途侵盜漕糧。按律治罪。所欠漕米。照數嚴催追  
賠。○十二年題準。衛軍水次承運。有衛官隨幫  
官常例。書識管家抽豐名色。州縣官。知府。同知。  
通判。及糧道。漕院。各衙門吏胥班役。勒索陋規。  
並過淮攤派使費。沿途需索土儀。及抵通過壩。  
交倉船規常例。倉場坐糧廳書吏。苛索使費。飭  
令各該衙門。盡行禁革。在外責成總漕。總河各  
該督撫。並巡漕科道。在內責成倉場侍郎。巡倉  
科道。協同釐剔。倘有前項弊端。立即題叅究處。

以肅漕政。○又題準。監兌漕糧事竣之日。監兌  
官將有無需索等弊。具結投送督撫存驗。事發  
以溺職坐罪。○十三年題準。水次將米折銀。罪  
在經徵有司。并監兌官。如過淮盤驗短少。將監  
兌官照例叅處。其嚴禁盜賣。令沿河各官。具結  
呈報。如糧船到通挂欠。審係某地方盜賣者。即  
將該地方官叅處賠補。○十五年題準。運弁領  
運漕船。各有定數。如中途歸并帶運。冒支行月  
水脚等銀。按照缺船數目嚴追。從重究處。○康  
熙二年奏準。運船交兌之初。專責糧道。曉諭商



牙禁約運軍不許夾帶私貨漕糧兌畢未開之  
先專責監兌官逐船搜檢糧道隨取監兌官察  
明並無夾帶甘結送總漕總河倉場侍郎三處  
稽考如有犯者拏解糧道呈報總漕題叅照律  
治罪○又題準沿途城市鎮店貨物輻輳之所  
專責押運通判極力催行不許停泊通幫前後  
不時稽察如稽察不嚴即將通判題叅照例議  
處○又題準運軍包攬客貨私載船內運官隨  
幫官嚴加稽察許於司漕衙門據實出首免罪  
如隱匿不報一經察出運官隨幫官加倍究擬

運軍依律治罪○又議準糧船經由地方自水  
次至淮安總漕同淮揚道盤詰一次至濟寧總  
河同濟寧道盤詰一次○三年題準官軍赴兌  
漕糧爭索斛面酒席譟辱糧官者運官以故縱  
議處運軍俟船糧抵通之日嚴行究治○五年  
題準運弁侵蝕各軍月糧銀米俟抵通交盤之  
日倉場嚴審究擬○又題準運軍多收斛面入  
已并運官知而不舉均從重擬罪勒索之米照  
追入官○又題準領運官弁勒索運軍飯米擅  
扣行月公費等銀及縱容親僕需索常例者俟

抵通交糧完日。令倉場侍郎嚴提審追。按律究擬。○又題準舊例。弁軍爭告。在未兌糧之先。責令糧道嚴察。不許領運。如在領運之後。俟完糧回南日。聽該衙門審理。嗣後有擅準運。蠹呈詞。拘繫新運幫官。稽悞新漕者。照悞漕例議處。運蠹嚴審究擬。○六年題準。運弁自悞限期。捏詞卸罪。誣告官吏糧里者。依律擬杖。○八年題準。運弁領運全單。不填註支領糧銀月日。照踈忽例議處。○十一年題準。運弁私載客貨。與已貨及裝載私鹽者。均革職。運軍私攬客貨。私載已

貨及裝載私鹽。運官失於覺察者。降一級調用。該管糧道。不嚴禁者。罰俸一年。○二十一年題準。收兌漕糧多攙糠粃砂土者。該管官革職。監兌官降一級調用。其抵通交兌漕糧米多糠粃。及有砂土者。押運官革職。糧道降一級調用。○二十五年題準。紅駁船分運漕米。如有用石灰泡水。及藥水灌漲糧米者。領運弁軍。呈報倉場侍郎究審。將運船人夫。發寧古塔等處披甲。人為奴。短少之米。勒限著落正身船戶家產賠完。如駁運米好。弁軍勒索不收。亦交與刑部從重

治罪。○二十六年題準。沿途催漕將弁。縱兵索詐漕船。以致運軍畏避。船米撞沉者。革職。嚴拏究擬。○二十七年題準。運弁需索運軍未遂。不顧風浪。逼船渡江。以致漂沒漕糧。泮斃人口。照例治罪。追埋葬銀。給死者之家。漂沒漕米。仍著落該弁賠補。○二十八年題準。運官縱軍捉船駁淺。漫無約束者。題叅。照溺職例革職。○二十九年題準。運官縱令運軍搭臺演戲。停泊不行。貽誤漕運者。照例革職。○三十年題準。運官不親運者。將承派衛備。及押運通判等官。交部議

處。○又題準。押運官沿途耗費漕糧。妄呈同押官折收者。勒追全完。仍照誣告律治罪。○四十一年題準。運軍沿途盜賣漕糧。押運官弁失覺察者。各降一級調用。○四十三年題準。漕船重運入境。責令沿河該管道。府。州。往來巡察。嚴緝盜賣。如失察盜賣一起者。州縣官罰俸六月。道府罰俸三月。四五起以上者。州縣官降一級調用。道府降一級留任。若道府州縣能察實拏獲。將賣糧買糧之人。均枷號一月。示衆。滿日責三十板。糧米追交本船。米價入官充餉。運弁俟回

南聽總漕捆打四十○四十八年題準各省漕船除帶運鋪墊倉廩楞木松板及每船土產貨物外如有民船雜於糧船幫內及將駁船竟造大船夾帶私貨並船上堆置木植船尾拴縛木筏過關又違例多載私貨者總漕總河及糧道嚴察將該運弁題參治罪○五十一年奏準每幫十船令各軍連環保結互相稽察如有折收盜賣等弊事發之日本軍照例治罪其餘九軍一同責懲○五十七年題準令將浙江幫船分夾江南幫內湖廣幫船分夾江西幫內使彼此

勢孤力薄免致爭鬪○五十八年奏準江西湖廣糧船該督撫責令糧道押運等官并地方文武官弁於上流漢口吳城集貨馬頭嚴加察禁不許商民貨物私上糧船亦不許運軍包攬私貨取具糧道押運等官弁并地方官甘結報明總漕如違例私帶過淮盤糧時察出貨物照例入官軍商皆從重治罪糧道及押運等官皆嚴加議處○雍正元年議準運弁管押重運擅自離幫及本軍在南浚託別軍包運並隨幫與副軍不親在幫押空以致遺棄漕船有悞新運者

將弁從重治罪。糧道指名題參。○又題準失風船到壩。舊例驗其米色不堪起卸者。準其賣銀買補。嗣後如有不肖運軍。乘機夾帶好米。私行盜賣者。令倉場坐糧廳。不時巡察究治。若在南串通州縣倉役。將米折銀。或將原米盜賣。掩飾過淮。故買爛米充數者。令總漕密加訪察。將弁軍胥役。從重究處。該管官題參。○又題準漕糧不許顆粒上崖。如遇過淺添夫。止許照常給錢。不得任意索米。違者以盜賣盜買。從重治罪。地方官照失察偷盜例題參。○二年

諭。朕惟漕運關係甚大。經費本無不敷。運軍恣行不法。皆由官弁駁削所致。如開兌之時。糧道發給錢糧。任意扣剋。運軍所得。十止八九。而僉軍之都司。監兌之通判。又多誅求。及至開行。沿途武弁借催趲為名。百計需索。又過淮盤察私貨。徒滋擾累。究屬無益。運軍浮費既多。力不能支。因而盜賣漕糧。偷竊為非。無所不至矣。嗣後各省糧道。給發錢糧。不許扣剋分釐。沿途武弁。不許借端需索。運軍除包攬抗違外。所帶些須貨物。亦無容苛刻盤察。爾部行文各督撫。不時稽察。如有仍前需索等弊。立即指參。從重治罪。欽此。○

三年題準。運軍南北往返。必需食鹽。每船準於受兌上船處。帶鹽四十斤。交卸回空處。帶鹽四十斤。此外多帶者。同私鹽治罪。○又題準。糧船攜帶火礮鳥槍。一經察出。本犯照私藏鳥槍例處治。糧道衛守備運弁。照失察例叅處。○四年題準。領運弁軍。不諳漕務。封閉倉門。以致倉米霉變。弁軍按律究擬。虧折漕米。勒限著落運軍賠補。不完。從重治罪。○又題準。運弁兌漕。勒索各屬經承者。斥革究擬。所得銀物。追取入官。○五年題準。漕米到淮盤驗。潮濕霉變。將經徵州縣官

照例革職。監兌官照溺職例議處。糧道不先揭叅。照狗庇例議處。運弁溷行收兌。照例革職。留任。俟船糧抵通。令倉場侍郎按數稽察。如有虧折。勒限賠補。限內不完。題叅革任。追賠。○六年奏準。運軍用水撓和漕糧。運弁狗隱不報者。革職。枷示河涯。俟漕竣日釋放。運軍用大枷枷號示衆。漕竣日。僉妻發黑龍江。給披甲人為奴。押運官湯無覺察。照例革職。○八年題準。漕船到淮。向有給管糧經承津貼飯食陋規。嗣後定例。大幫給銀六兩。小幫四兩。呈繳給發。不許私相

授受。違者提究重處。○又題準。漕船到淮。飭各幫字識繕造米數軍舵姓名等冊。不許總漕冊房攬造。科派使費。犯者嚴加究治。○又題準。江浙糧艘。由鎮江出口。方監篷桅。舊例委催漕官。就便察看。不無需索。嗣後俟過淮時。總漕親加點驗。至各省糧船。總滙於揚州之三汊河。例委幹員彈壓分幫。如委官及跟隨人役。需索盤費。一例叅究。○又題準。漕船渡黃。汛弁不顧風色。水勢妄行催趲。借端需索者。照失於防範例議處。致有疎虞。加倍治罪。○又題準。漕船渡黃後。

提溜打閘。向有弁兵串同人夫。勒索運軍倍出工價陋規。應於重運北上時。責令委駐營將約束禁止。倘有縱容徇庇。一并會叅究處。○又題準。漕船應領修艙銀。例應照數給發。運軍毋許需索使費陋規。至運軍有以朽腐船撞觸民船。借端索詐者。即將該幫弁軍究處。○又題準。運軍攬載客貨船。重難行。強奪民船。駁載糧米者。照水手搶奪例治罪。其攬貨私得稅銀。并商民通同聽攬者。均照違制例治罪。○又題準。正副二軍。赴次交兌。如有革軍衿監。攬身入幫。即拿

交地方官究治。若運官不察拿，一并究治。○十年覆準。淮安乃各省糧艘總匯之區，一切陋規久經裁革，恐日久生弊，照通州石土二壩建碑之例，於盤糧廳後設立碑一座，將裁革陋規刻石，永遠遵行。○十一年奏準。各省漕船不許裝運無引私茶，如違禁攜帶，於過關時察出，即照私鹽例治罪。○乾隆元年奏準。糧船夾帶私鹽，多由土豪預買私鹽，窩囤河干，勾通售買。嗣後天津地方，令巡漕御史暨運使實力緝拏，其沿河地方，令各督撫提鎮嚴飭沿河文武官

弁。凡糧船經過時，差兵役竭力稽察。如有水手人等私帶貨賣，以及土豪預買窩囤情弊，一面嚴拏，按律究治。一面催船前進，勿得留難誤漕。倘徇縱失察，一經發覺，將督運押運官弁以及前途失察之地方官弁，並失察豪強之地方州縣，均照例叅處。其鹽除留食鹽外，餘皆入官。○三年奏準。運軍盜賣漕糧，頭舵工不舉，照不應重律治罪。受財者，計贓從重論。○又奏準。重運入境，道府州縣往來巡察，如失察盜賣者，照例議處。其武職催漕，向未有失察處分，未免漫不



經心嗣後沿河營弁失察盜賣漕糧。嵩汛千把。照州縣例議處。兼轄遊守。照道府例議處。如嵩汛千把及文職州縣。一年內能拏獲二次者。紀錄一次。兼轄遊守及文職道府。一年內於所管內拏獲至四次者。紀錄一次。再有多獲。照此遞加。至汛兵疎縱失察者。革役。照不應重律杖八十。知情賄縱者。計贓以枉法從重論。若能拏獲報官。審實。將米仍歸本船。其應入官之米價。追賞兵丁。○又奏準。小船受雇裝載。盜賣漕糧。拏獲之日。不得諉以不知。照賣糧買糧。加責例。減

二等發落。○又奏準。盜賣漕糧。定例賣買之人。加號一月。責三十板。糧交本船。價追入官。至運軍食米。向無禁賣之條。有將漕糧舂熟。假稱食米。盜賣者。嗣後運軍多餘食米。於抵通交米之後。方準變賣。如重運漕船。沿途賣米。不論糙熟。皆照漕例治罪。○又奏準。運軍不拘回空重運。如有無故潛逃。棄船中途不顧者。照守禦官軍在逃律治罪外。仍於面上刺逃丁二字示儆。○四年奏準。如有重運盜賣漕米。回空之船代為承認者。該管官嚴加稽察。察出。將賣買軍民一

并照例治罪。○又奏準。失察盜賣漕米。合算米數不及五十石者。仍照失察次數處分。其失察一二次。米數至五十石以上者。將該地方官降一級留任。道府等官。罰俸一年。失察一起至三起。合算米數至百石以上者。地方官降一級調用。道府等官。降一級留任。○又奏準。各省受兌開兌之時。令總漕密加察訪。如押運官弁以及糧道等衙門吏役。有科斂陋規。幫規之弊。即嚴叅究處。並飭該管官不時嚴察。有陽奉陰違者。將與受之官軍等。照例詳揭。倘該管官徇隱不

揭報。一并題叅。○五年題準。江廣等幫漕船。多帶土產竹木。沿途貨賣。其竹木於天篷上裝載。毋得過高二尺。如有違例多裝。令押運官弁勒令起卸。嚴加責懲。竹木入官。如官弁通同徇隱。照例叅處。○六年奏準。糧道催米催船。督押催船。凡差役滋擾之弊。定例皆經禁革。惟豫省提幫出運時。先發一牌。繼差一役。賫票前至衛所提催。不無假威滋擾。嗣後嚴行禁革。并飭各省一體遵行。如有陽奉陰違。指名叅處。○七年奏準。江廣漕船。所帶土產竹木。水大之年。準其帶

至臺莊以南一帶卸賣。不得帶過臺莊。水小之年。令其在淮揚一帶卸賣。不得帶過黃河。○八年題準。漕船如有失風事故。以致米色黧黯不純。驗明米色稍減。尚屬堅實。可以久貯者。派倉收受。其所減成色米。責丁賠補。於次年搭運抵通交納。

一回空禁例。順治十六年題準。押空官串通運軍。盜賣漕船。提究追賠。買主從重懲處。○康熙五十一年題準。糧船回空。至德州桑園地方。總漕選委能員。協同德州衛弁。搜索私鹽。并飭

地方文武官弁。嚴拏窩囤。如有夾帶私鹽事發。將專委漕員。德州衛弁。押運官弁。并該地方官。題叅嚴加議處。○雍正元年奏準。回空船過天津關。長蘆巡鹽御史。會同天津鎮總兵官。親往察放。至山東河南交界地方。總漕巡撫鎮將。差委知府遊擊等官搜檢。如有夾帶私鹽。盡拋入河。失察各官。照例議處。○二年題準。回空糧船。夾帶私鹽。不服盤察。持械拒捕者。分別十人上下。及傷人不傷人。各按首從。依律治罪。其雖無私鹽。但闖關闖閘者。亦分別首從治罪。若未闖

關閘。但夾帶私鹽者。照販私律。加一等治罪。○  
又題準。糧船夾帶私鹽。將販私地方之專管官。  
降三級調用。兼轄官。降一級。罰俸一年。押空之  
運官。照狗庇例議處。隨幫革退。其恃眾闖閘。闖  
關。及犯私拒捕傷人者。押運等官革職。隨幫照  
例責革。○三年題準。糧船回空。凡經由產鹽處  
所。地方文武官弁。晝夜催行前進。不許逗遛。并  
嚴拏囤戶串通運軍販賣私鹽。該管鹽務運司  
等官。巡察各場竈。不許夾帶餘鹽出場。如有狗  
隱疎縱者。叅處。○又題準。回空糧船。至揚州儀

徵。向例總漕委官。協同揚儀營汛。并地方官搜  
檢。嗣後改於瓜洲江口。令瓜洲營協會同江防  
同知搜檢。如有私鹽事發。究明場竈地方。并裝  
運上船日期。將各該地方官失察職名題叅。○  
又題準。押運官弁。一年之內。該管幫船。並無私  
鹽事故。準予紀錄一次。隨幫能拏獲。首明私鹽  
三次。及該幫三次回空。並無私鹽事故者。該管  
上司。出具印結咨部。以千總推用。○四年題準。  
漕船抵通。完糧回日。所餘行月等米。舊例聽其  
沿途買賣。嗣後全糧過壩之幫。遇有剩米。必赴

坐糧廳批照。然後準賣。若未經給照。擅行私賣。私買者。照例究處。○十年奏準。回空糧船。過山東時。該撫預於晉省私礮入境之處。令地方官弁。分路巡察。本省焰礮。亦實力稽察。毋許囤戶偷販河干。暗送入船。并令搜檢私鹽之文武官。帶檢硝礮。如察出私帶硝礮。亦照私鹽例究明。叅處。押運官弁失察。照糧船夾帶私鹽例議處。○乾隆元年奏準。漕船回空。押運官弁。多不隨船南下。頭舵水手人等。往往欺壓行船。嗣後如遇回空糧船。行克爭鬪。藉端將來往行船阻留。

捆毆商民等事。許沿河汛弁。察明情由。及幫次船號。運軍姓名。一面速令遄行。一面詳報總河。咨明總漕究治。○三年奏準。糧船回空。令督撫。總督倉場侍郎。轉飭天津河道押運官弁。嚴察除日用盤費錢。準其攜帶外。如有將制錢裝載數十貫。捏稱壓船。希圖販賣者。拏究。若胥役人等。借端需索。亦即究治。○又題準。回空軍船。應帶食米燒煤。向無定數。嗣後江西省。每船準留食米四十五石。燒煤四十石。湖南省。每船準留食米三十六石。燒煤三十二石。湖北省。每船準

留食米三十三石七斗五升。燒煤三十石。江浙  
每船準留食米三十石。燒煤二十五石。自通州  
至宿遷淮揚等處。逐關察驗扣除。免稅放行。不  
得越數多帶。巡役人等。亦不得勒索留難。○六  
年奏準。押空隨幫。一年之內。並無私鹽事故者。  
準其於補官日紀錄一次。○七年奏準。薊運回  
空。行令直督轉飭薊州文武官弁。俟糧船抵薊  
卸糧之後。即催回空。不許在該地方創取白土。  
裝帶上船。并令出示。曉諭沿河各市鎮鋪戶人  
等。不許將白土賣與糧船。致滋攙和情弊。如嗣

後經關口汛地。察出薊運回空帶有白土。並兵  
役人等。遇有糧船偷買白土。拏獲審出實情。將  
該運弁與押空千總。均照運軍攙和水米運官  
不行稽察例革職。其該船軍舵。照運軍使水攙  
和發遣例減一等。杖一百。徒三年。偷買白土之  
軍舵同罪。如將白土攙入漕糧。至百石以上者。  
即照攙和水米例。發遣黑龍江與披甲人為奴。  
知情收買收賣之鋪戶。照違

制律杖一百。仍枷號一月發落。并不行察禁之薊州  
文武官弁。皆照出洋商船私帶軍器地方官不

嚴行禁止。罰俸一年。○十四年題準。天津阿城  
淮安儀徵等產鹽之鄉。貧難老幼。一遇漕船經  
過。充塞河干。負鹽售賣。令督撫轉飭地方營汛  
官弁。嚴行稽察。毋許老幼男婦跟船貨賣。其舵  
工水手應需食鹽。只許向官鋪售買。每船總不  
許出定例四十斤之外。如多帶私鹽。即嚴拏究  
治。若不實力稽察。照例議處。

一漕糧雜禁。順治十四年題準。領運弁軍。如  
有借端擾害。過往官商船。及恣橫生事者。督撫  
鎮道等官。嚴拏照營兵鼓譟例。先從重處治。一

面題。叅送刑部究處。○康熙元年

諭。糧船經由漕河。領運官軍。依限抵通回空。方為盡職

無罪。乃有等姦頑官役。不守成法。多有夾帶私販貨  
物。隱藏犯法人口。倚勢恃力。行克害人。借名阻礙河  
道。毆打平人。託言搜尋失物。搶劫民船。且有盜賣漕  
糧。中途故致船壞。以圖貽累地方。種種姦惡。督漕各  
官。并該地方官。一有見聞。即行叅奏。務將官員嚴提  
治以重罪。若知而徇隱不奏。亦從重處治。欽此。○六

十一年題準。糧船頭舵水手。有砍伐官柳。拆毀  
緯橋。拔椿。掘埽者。嚴提治罪。估價追賠。押運官

弁及地方文武各官。并加叅處。○又題準。水手夥衆。搶奪十人以上。執持器械者。首犯照強盜律治罪。為從減一等。十人以下。無器械者。照搶奪律治罪。出結之運軍。及頭工舵工。容隱不首。照強盜窩主例。分別治罪。○又題準。押運領運各官弁。例應嚴押漕船。毋許運軍舵工水手登岸生事。如有不法。即會同地方催漕各官。協拏究治。倘平時漫不約束。臨事又復容隱者。總漕指名題叅。照例革職。○雍正元年。

諭江南浙江江西湖廣山東河南各省總督巡撫。漕船關

係緊要。除本船正副運軍外。其頭舵工水手。皆應擇用本軍。庶各知守法。不敢悞漕生事。近聞多雇募無籍之徒。朋比為姦。不服運軍彈壓。當漕糧兌足之後。仍按延時日。包攬貨物。以致載重稽遲。易於阻淺。不能如期抵通。及回空經產鹽之地。又串通姦頑。收帶私鹽。此其弊端之彰著者。聞尤有不法之事。凡各省漕船水手。多崇尚邪教。聚衆行兇。一呼百應。適年以來。或因爭鬪。傷害多人。或行劫鹽店。搶奪居民。種種兇惡。漸不可長。亟宜懲治。爾該督撫。即嚴飭所屬各衛所。嗣後糧船。務於本軍內。擇其能撐駕者。充當頭



舵工水手。不許雇募無籍之人。更嚴禁邪教。諭令歸業。務為良民。如仍怙惡不悛。該地方官不時查拏。從重治罪。如奉行不力。即將該管官弁。指名題參。欽此。

○五年題準。姦徒專放糧船私債。舊例許運官並運軍自首。照私放官債加等治罪。嗣後有違禁取利。盤剝運軍者。責令地方文武各官。及坐糧廳。立拏究治。如地方官坐糧廳。不即嚴拏。及該管運弁。縱軍私自借債者。一經發覺。皆交部嚴加議處。○十年覆準。漕船損壞。皆因運河水道。舊堤遺址。積年淘卸。激衝日就窪下。舊存石塊。

木椿。淹沒水底。糧船過此。一經抵觸。多致損壞。應嚴飭沿河鎮道等官。於水落之時。沿途細看。凡有阻礙。悉行起除。倘起除不淨。抵觸漕船。總漕并巡漕御史。將該管河道等官。題參議處。○十三年

諭。朕聞南方濱江兩岸。多係蘆洲。民間將蘆葦堆貯洲上。賣以度日。而江楚及上江各幫漕船。由江經回。竟有不法水手。每遇蘆柴堆積之處。輒糾集多人。蜂擁上岸。恃強奪取。洲民攔阻。動輒毆詈。甚至有強取鷄鴨等物者。小民畏勢。莫敢與較。水手肆行如此。運弁

即坐本幫船糧之內。安得推為不知。至督運之糧道。押運之府佐。雖云統轄衆幫。亦當留心稽察。何得任其多事。著漕運總督。通行曉諭。倘有仍蹈前轍者。經朕訪聞。必將大小文武運官。分別嚴加議處。欽此。

乾隆元年議準。糧船水手。遇有事犯。如已經離船。以及未經上船之先者。不得拖累運軍。如有棄差逃走者。令在押運通判處。十日一次呈報。

○四年奏準。催漕弁兵。需索運軍銀錢土物者。經該管上司。及巡漕御史察出。係兵將該管干把。照失察衙役犯贓例議處。係汛弁。將該管上司。

照不揭報劣員例。分別議處。需索之弁兵。計贓以枉法論。土宜禮物。照挾勢豪強之人。接受所部餽送土宜禮物受者。笞四十。與者減一等律。分別治罪。贓物給還。如兵弁需索運軍。或運軍行賄。而押運官不卽申報。照應申報上司而不申報例處分。如知情故縱。照以財行求律受財者。與以財行求之運軍。一體治罪。追贓入官。如運軍被索。卽時首告。免罪。追贓給主。其贓少首多。或因催行挾私誣首。照誣告律。分別治罪。如不行首告。仍照以財行求律。與受同科。贓物入

官催漕弁兵。遇有運軍行賄。據實盡首。免其治罪。追贓入官。運軍照以財行求律治罪。○五年議準。糧船沿途提溜趕幫。雇用短絳。每夫每里給制錢一文。打閘每船用夫一名。給制錢一文。如閘壩水急難過。夫役守候。臨時酌增。催漕兵役。毋得借端勒索。至各夫雇價。給與見錢。毋得以貨抵給。如有兵役夫頭。派添短絳。多索夫價。從中取利。貽害運軍者。照霸占損擡。分外多取雇值。不容本家雇人者。枷號兩月。杖一百例治罪。該管官弁。自行察出懲究者。免其叅處。如漫

無覺察。照失察衙役犯贓例議處。其扶同狗隱者。照縱役犯贓例革職。○又奏準。各幫頭船運軍。有借沿途使費名色。科派各船。包攬侵蝕之弊。應專責運弁稽察。如運弁串通頭船。運軍科派各船者。照因公科斂律。杖六十。贓重者坐贓論。若分肥入己者。計贓以枉法論。如運弁知情狗庇者。照縱容衙役犯贓例革職。其失於覺察者。照失察衙役例分別議處。○七年奏準。漕規諸弊。均有嚴禁之例。惟恐日久弛玩。刊刻木榜。列於瓜州閘口。儀徵江口。淮安之盤糧廳。濟寧

臨清。天津。通州。各口。俾往來弁兵。觸目警心。仍令該管官。不時稽察。如有干犯。照例題叅究處。○八年奏準。運軍正身不押運者。將承派運軍之衛守備。罰俸一年。領運守千。徇私不稽察者。降一級留任。惟隨幫武舉。向無責成。嗣後領運官弁。徇私縱容。代運隨幫。知而不報者。照應申上而不申。上律議處。

一倉漕奏銷。順治十二年題準。輕賚由閘席片板竹行月等項。一應隨漕錢糧。經管各官。逐款備造管收除在清冊。在糧道者。總漕按年奏

銷。在坐糧廳大通橋者。總督倉場按年奏銷。○又題準。漕糧徵兌。總漕派發全單。取造軍衛有司額漕數目報部。如有未完。卽行指叅。○康熙二年題準。輕賚席片松板楞木本折錢糧。出運減存行月銀糧。漕贈銀米。過湖淺船倉米副米。並修造漕船。淺貢運官廩工。民七料價。六升米折。及蘇松常鎮四府。協濟壽淮揚鎮等倉米麥銀兩。此等漕項錢糧。均取在地畝銀米內支用。備辦舊例。各作分數考成。嗣後總作十分。總漕每年造冊奏銷。○十五年題準。江南省衛。江淮

興武等幫水手銀總歸江安糧道催徵給發造冊呈送巡撫奏銷○又奏準江寧省衛本折行月總歸江安糧道管理○十八年題準德州倉額徵本折麥米歸併糧道專管報銷○二十三年奏準奏銷冊籍將支用款項總撒數目分晰開造如有款項不符溷行造冊題報該管督撫照朦混例處分○二十四年題準臨清倉應徵米麥各屬相距甚遠解送維艱應準其折徵解倉支給報銷○二十六年奏準存留項下錢糧在本省支用並支剩者不作分數隨起運數內

造冊奏銷○二十七年題準江南減存行月廩工備料小料等項銀照湖廣江西之例停其解淮徑解江安蘇松糧道歸入漕項奏銷案內題報○二十九年題準河南額解臨清德州二倉錢糧歸驛鹽道兼理其奏銷考成該撫于年終具題○三十一年題準德州倉奏銷考成於次年五月內依限奏銷○三十二年題準蘇松所屬州縣額徵加漕裁扣六升等銀原係供支蘇松漕糧運軍行月之需舊例解交江安糧道給發報銷今酌定解交蘇松糧道總作完欠支給

奏銷。○三十二年覆準。淮安徐州鳳陽三倉徵收米麥豆各州縣。離倉寫遠。往返盤駁。官民受累。應照漕折定例折徵。竟解糧道支給。○三十五年題準。各省漕項錢糧。向係總漕隔年奏銷。嗣後應照地丁錢糧之例。於次年五月奏銷。但查漕糧十月開徵。至次年九月方滿。與地丁不同。嗣後仍照舊例。隔年三月奏銷。○又題準。臨德江寧淮徐鳳陽等倉。編徵行月銀及米麥。原係供支運軍廩糧之需。江寧德州二倉。統入漕項奏銷。其臨清倉月糧。淮徐鳳三倉行月錢糧。

總漕照例於隔年三月別案題銷。○六十年題準。奏銷本年錢糧。將上年存剩錢糧。作為舊管。本年已完錢糧。作為新收。仍將舊管收除。別造簡明清冊送部。○雍正七年題準。漕白二糧奏繳。及通濟庫錢糧奏銷。向未定有限期。今酌定於次年五月內造冊具題。○十一年題準。江寧淮安徐州鳳陽四倉錢糧。奏銷考成。舊例該管督撫於次年五月內具題。今展限一月。江寧淮安鳳陽三倉。均於次年六月內題報。徐州一倉。江督仍照原限奏銷。○十二年奏準。漕項奏銷。

部覆駁訊數項。向例扣限四月。按款咨覆。未完錢糧。扣滿年限咨叅。雍正十年。部議將漕項登答。改爲一年一次具題。未完銀內續完數目。令其歲底彙報。并造入下次奏銷。新收春秋季冊之內。案牘紛繁。彼此牽濶。反難察覈。應仍照舊例。其節年未完錢糧。續完若干。仍未完若干。並動用存貯各數。該省分別造冊。別繕題本。隨本年奏銷。一并題報。

一漕糧考成。順治十三年題準。各省漕糧。經徽州縣衛所各官。初叅未完不及一分者免議。

一分以上。罰俸六月。二分以上。住俸。三分以上。降二級。四分以上。降三級。五分六分以上。革職。均戴罪督催。完日開復。○又定例。州縣衛所各官。叅後漕糧。違限不完者。加倍議處。應罰俸者。住俸。應住俸者。降二級。應降二級者。降四級。應降三級者。革職。戴罪督催。完日開復。應革職戴罪者。實降二級調用。○十八年題準。州縣各官。初叅。淮徐等六倉糧銀。未完不及一分者。停其升轉。一分罰俸六月。二分罰俸一年。三分降俸一級。四分降俸二級。五分降職一級。六分降職

二級七分降職三級。八分降職四級。以上皆戴罪徵收。停其升轉。完日開復。九分十分草職。布政司知府直隸州知州。初叅各倉糧銀未完不及一分者。停其升轉。一分罰俸三月。二分罰俸六月。三分罰俸一年。四分降俸一級。五分降俸二級。六分降職一級。七分降職二級。八分降職三級。九分降職四級。以上均戴罪督催。停其升轉。完日開復。十分草職。巡撫。初叅各倉糧銀未完不及一分者。停其升轉。一分二分罰俸三月。三分罰俸六月。四分罰俸一年。五分降俸一級。

六分降俸二級。七分降職一級。八分以上降職二級。均戴罪督催。停其升轉。完日開復。署印官。初叅各倉糧銀未完不及一分者。停升。一分二分罰俸三月。三分四分罰俸六月。五分六分罰俸九月。七分八分罰俸一年。九分十分降一級。調用不及一月者免議。州縣各官叅後各倉糧銀限一年內全完。如限內不能全完。原叅不及一分者。罰俸一年。一分二分降三級調用。三分四分降四級調用。五分六分降五級調用。七分八分草職。布政司糧道知府直隸州知州叅後。



各倉糧銀限年半全完。如限內不能全完。均照州縣官例處分。巡撫叅後。各倉糧銀限二年內全完。如限內不能全完。原叅不及一分者。罰俸一年。一分二分。降二級調用。三分四分。降三級調用。五分六分。降四級調用。七分八分。降五級調用。九分十分。革職。○康熙二年題準。見年額徵漕項錢糧。或一官經管。或數官經管。總作十分計算。不必分作十分。接徵接催之官。均照經徵督催例議處。○又題準。漕項倉項錢糧叅後。各立年限。州縣各官限一年。糧道知府限一年。

有半。巡撫限二年。催追全完。不完。不復作分數。均照原叅分數處分。○又奉

旨。各省糧道。不必分別正官署官。功罪均著一體行。欽此。○又題準。臨德江寧淮徐鳳陽等倉銀糧。經徵督催官。與隨漕項下錢糧。各作十分考成。○又題準。巡撫等官。催徵錢糧。叅後年限已滿。該撫將自欠原叅分數。暨糧道等官分數。不於叅本聲明。察出。照原叅分數。加等治罪。○又題準。各省隨漕輕賚等項錢糧。經徵州縣衛所各官。初叅未完不及一分者。停其升轉。罰俸一年。一

分降職一級。二分降職二級。三分降職三級。四分降職四級。均戴罪徵收。五分以上革職。督催糧道知府各官。初叅未完不及一分者。停其升轉。罰俸六月。一分罰俸一年。二分降職一級。三分降職二級。四分降職三級。五分降職四級。均戴罪督催。六分以上革職。巡撫。初叅未完一分二分者。罰俸三月。三分罰俸六月。四分罰俸一年。五分降俸一級。六分降俸二級。七分降職一級。八分降職二級。均戴罪督催。完日開復。州縣衛所各官。隨漕輕賫等項錢糧。叅後年限內不

能全完。原叅不及一分者。降一級調用。一分降三級調用。二分降四級調用。三分降五級調用。四分以上革職。巡撫糧道知府等官。叅後年限內不能全完。原叅不及一分者。降一級。仍戴罪督催。其餘均依州縣例處分。署任各官。未完不及一分者。罰俸三月。一分罰俸六月。二分罰俸九月。三分罰俸一年。四分五分降一級調用。六分七分降二級調用。八分以上革職。不及一月免議。○又題準。山東糧道。專管漕糧。自開兌開幫。以及抵通交倉。皆躬親尾押。臨德二倉。改折

徵銀免其考成。○八年題準。向例各省巡撫經管漕糧完欠均照糧道例議叙議處。嗣後停止議叙。如有未完。仍照糧道例處分。○十年題準。督催糧道知府等官。初叅未完不及一分免議。一分以上。罰俸三月。二分以上。罰俸六月。三分以上。住俸。四分以上。降二級。五分以上。降三級。六分以上。革職。均戴罪督催完日開復。糧道知府等官。叅後漕糧違限不完。加倍議處。應罰俸三月者。罰俸六月。應罰俸六月者。住俸。應住俸者。降二級。應降二級者。降四級。應降三級者。革

職。戴罪督催完日開復。應革職戴罪者。實降二級調用。其署印各官。未完漕糧。照雜項錢糧署印官未完例議處。一分二分。罰俸三月。三分四分。罰俸六月。五分六分。罰俸九月。七分八分。罰俸一年。九分十分。降一級調用。不及一月者免議。○十四年題準。漕糧改折銀與隨漕項下錢糧各作分數題叅。○又題準。州縣衛所官。原叅不及一分。年限內不完者。降一級留任。再限一年內催完。如又不完。照所降一級調用。○又題準。署印官。初叅各倉銀糧。在任不久。其欠不及

一分者。毋庸停升。○乾隆五年議準。浙江漕項奏銷。本折月糧廩工永減淺貢等款。列爲一冊。漕截灰石等款。列爲一冊。輕齋行折等款。列爲一冊。其向附月廩等款冊內之本色月糧一欸。改入輕齋行折冊內。統算考成。○又題準。道庫州縣。應解應給銀米。任意遲延。或移催衛幫。不卽支領。卽於各本案內。將道縣衛遲延職名。察確附參。○七年奏準。漕白二糧。未完各官。初參二參考成。均照隨漕輕齋等項錢糧。分別議處。一白糧考成。順治十一年題準。白糧與由閘銀

總屬正項。其完欠分數。應以銀米總計合算。如有未完。照例議處。○康熙六年題準。經徵督催白糧各官完欠考成。照題定漕糧考成例議處。其交兌過淮抵通限期。以及議叙議處條例。均照漕糧例處分。○十七年題準。白糧改折經費。銀原係白糧項下。應徵之欸。與白糧一例考成。○三十三年題準。白糧項下減存經費銀。係解部之項。如不預行詳請。擅自動用。將擅動之官題參。銀兩著令賠完。

一倉庫盤察。康熙六年題準。漕項錢糧。乃輓運

急需司府州縣等官如將徵完之銀那動給發別項支用者糧道詳報總漕題叅○二十八年題準各省糧道存庫錢糧於年終及離任之日責成藩司親身盤察出結如有虧空立即揭報該撫題叅○雍正四年議準道庫實存錢糧自雍正五年為始照司庫例每年春秋二季造冊報部聽候撥解京餉○又題準江安蘇松江西湖南湖北山東等省糧道衙門各添設庫大使一人凡倉庫收放錢糧責成稽察其浙省道庫即令布政司理問兼管○六年題準江寧布

政司衙門徵收上下兩江應解南屯米麥豆舊有倉廩俱係吏役經收支放今添設倉大使一人管理以專責成○十年題準德州原設常豐德州二倉臨清州原設臨清廣積常盈三倉年久坍塌應於臨清德州各添建新廩六座責成糧道督率臨德二州加謹蓋藏年底盤驗出具實貯印結送部並令常豐臨清二倉大使巡察看守○十一年奏準各省道庫一應收支錢糧隨時知會藩司備案奏銷時將支銷存剩各款造冊移司盤察出結送部○又題準各省糧道

新舊交代任內收支錢糧均照布政司交盤例  
該管督撫造冊具題

一起運完欠。順治五年題準。漕欠無論多寡。  
均發各糧道嚴追。○九年奏準。挂欠漕糧弁軍。  
發南追比。承追各官。嚴察本弁本軍產業。估計  
變賣。盡數完糧。不得聽其株連。扳害。○十二年  
題準。挂欠弁軍。先在通州追比。勒限一年。如不  
能完。倉場題明。發南追比。再限一年追完。○又  
題準。官欠追官。軍欠追軍。每年發淮追比之時。  
分別欠數。研審明確。官軍一體嚴追。變產完賠。

如運軍侵糧脫逃。報明戶部。行總漕衙門。提究  
追擬。○十四年題準。運官到通。糧米全完。緣事  
呈誤。非係貪贓。失守。

大計。隱匿逃人。重罪。該部酌量分別。以鼓完糧。○  
十七年題準。總漕以通漕論。糧道以本省論。凡  
欠二分者。罰俸一年。再運又欠一分者。降一級。  
調用欠二分者。降二級。調用欠三分者。革職。○  
又題準。運官領運漕糧。交納。銷算。買補。以及隨  
幫代運全完者。不準議叙。○康熙元年題準。搭  
解舊欠漕糧。復有挂欠。倉場開列分數。題叅。照

例處分挂欠之米仍行照追○二年題準總漕  
巡撫糧道如通漕及本省衛所漕糧盡行開兌  
開幫北上運務一官經手者前官雖有事故離  
任功罪應歸前官後官免議其總漕有一二省  
巡撫糧道有一二衛所未經兌完開幫前官事  
故後官接管功罪應歸後官前官免議○八年  
題準糧船阻凍天津漕糧收受進倉非本年內  
全完至隔年始行運竣者糧道押運等官不準  
議叙○十年題準漕糧開兌過淮違限者其到  
通糧米雖已全完糧道等官不準議叙○二十

五年題準搭運舊欠米石與原欠米色不符者  
糧道知府罰俸一年領運千總草職○四十三  
年議準運官挂欠漕米以通幫糧米計算如挂  
欠不及一分者責二十草職追比追完還職免  
罪不完杖一百草職一分責三十草職追比追  
完免罪不完杖一百徒一年二分責四十草職  
追比追完免罪不完杖一百徒三年三分責六  
十草職追比追完免罪不完發附近衛所充軍  
四分責八十草職追比追完杖一百不完發邊  
遠衛所充軍五分責一百草職追比追完徒一

年不完者絞六分以上者斬。照例籍沒家產抵償。○又議準。運軍挂欠漕糧。以一船糧米計算。如挂欠不及一分者。責二十。草運追比。追完免罪。不完杖一百。一分責三十。草運追比。追完免罪。不完杖一百。徒一年。二分責四十。草運追比。追完免罪。不完杖一百。三分責六十。草運追比。追完免罪。不完杖一百。徒三年。四分責八十。草運追比。追完杖一百。不完發邊衛所充軍。五分責一百。草運追比。追完杖一百。不完者。絞六分以上者。斬。照例籍沒家產。妻子抵償。

○四十九年題準。漕糧挂欠。皆由糧道監兌押運等官。不親詣水次。面同兌足。糧船抵淮。總漕亦不嚴行盤察。以致弁軍任意折銀。沿途盜賣。嗣後將挂欠不及一分。至六分之弁軍。照例分別治罪。其總漕糧道等官。亦照例按所欠分數議處。並將所欠漕糧。算作十分分賠。總漕半分。糧道一分。監兌官半分。總押運官半分。運官一分半。僉丁衛所官半分。運軍五分半。按此分數。令總漕等官。於限內賠完。不完。總漕糧道各官。交部議處。運官運軍。照例治罪。仍將弁軍不能



賠完之米。著落總漕糧道等官賠償。至挂欠米石。既令總漕糧道分賠全完者。應行加倍議叙。山東河南湖廣三省糧道。改為加升一級。江南江北浙江江西三省糧道。改為加升二級。總漕議叙之例。於康熙八年停止。嗣後各省漕糧十分全完者。仍將總漕照例加升二級。○又議準。弁軍挂欠漕糧。承追督催等官。均照經徵督催淮徐等倉糧銀例議處。○五十一年題準。同幫運軍連名互結。如將赤貧之軍混行出結。僉運以致挂欠。不能賠補。將本軍應賠五分半之內。

令互結各軍攤賠一分。○又題準。嗣後一幫挂欠。府廳等官罰俸一年。糧道罰俸半年。幾幫挂欠。照此遞加罰俸。○又題準。押運同知通判一次挂欠。降一級。留任二次。降二級。留任三次。降三級。調用。○又題準。押運同知通判一次無欠。加一級。二次無欠。加二級。三次無欠。不論俸滿即升。○又題準。江浙積欠之幫。一運全完。其次挂欠之幫。三運全完。別幫五運全完。均準其即升。○五十四年題準。弁軍挂欠。嗣後免其留通。追比一年。令倉場侍郎將欠糧運軍拏交運官。

即行發南追賒挂欠之米石限次年搭運赴通  
交納如次年不行搭運總漕照例題叅○六十  
年題準欠糧運官有於倉場未題之先已升任  
他職者草職發追俟完糧開復之日照例補用  
○雍正元年題準領運千總一運全完加銜一  
等二運全完加升二等三運全完毫無事故者  
從優議叙即升其江浙積欠之幫仍照舊例二  
運全完準其即升○二年議準搭解舊欠漕米  
必以本色交兌搭運過淮之時總漕盤驗足數  
方許開行北上如有麥豆雜糧等項抵充漕欠

或過淮之後用小船趕送者總漕察明題叅○  
三年題準欠糧運官倉場即咨兵部開缺俟限  
內全完題請開復別行補用○五年題準弁軍  
挂欠漕糧向照失風挂欠之例止收平米免其  
晒颺折耗嗣後非失風而挂欠者照起運之數  
搭運抵通○十三年奏準運弁領運漕白船糧  
如有過淮違限而抵通全完者俟總漕將原叅  
過淮違限題準開復之後始準議叙加銜○乾  
隆二年奏準領運守千江浙等遠省一二運準  
按運加銜三運全完議叙即升不得復請加銜

至三運以後再能全完仍準按運加銜豫東二  
省官弁一三五運全完均紀錄二次二四運全  
完均加銜一等至六運全完方議叙即升亦不  
得重複加銜至六運以後仍照前相間紀錄加  
銜○又奏準重運効力武舉領運江浙等遠省  
每運全完準於補官日紀錄二次領運豫東近  
省每運全完準於補官日紀錄一次三運運滿  
咨部註冊推用○三年奏準各省糧船抵通起  
卸漕米如有不足向例準買別幫餘米抵補但  
各省收兌如果足數抵通何致不敷嗣後如有

不足即行參處著賠不準買補別幫餘米其各  
船運軍日用餘米坐糧廳給與驗票準其售賣  
外其餘各省漕米粟米一槩不許買賣交與通  
水道通州知州實力稽察如有不遵即行拏究  
倘稽察不力被倉場及御史訪聞將該道該州  
題參議處○四年題準豫東二省遞年輪運薊  
糧督押通判押運全完照例議叙○五年題準  
輪運薊糧千總準照東豫近省運通全完之例  
議叙○八年題準定例準以完糧議叙抵銷因  
公呈誤降級等案原指該弁本運降級事故即

以本運應得議叙抵銷。其一切罰俸案件。不準將完糧議叙抵銷。乃該弁等。竟有以應加之銜。故意遲延。預防將來呈誤降抵之計。於例未協。嗣後漕運各官。因公呈誤。應降調者。如本運議叙。準其抵銷。其前運應加之銜。槩不準抵。一漕船偶遇風火。順治十五年題準。漕糧改解兵米。大江漂流。準照漂沒糧數開銷。○又題準。糧船在江洋黃河漂流者。地方官察明。給有印照。總漕各該撫。覈勘明確。據實具題。準予豁免。如無題報。即於本軍名下追賠。若本軍無力

補完。將本幫餘米。匱羨扣抵。務足原數。○康熙二十一年題準。大江黃河漂流搶救者。將所搶米石。灑帶各船運送。其漂沒米石。準予豁免。若坐視不救。該督題叅。從重治罪。○又題準。漂流船糧。令沿途催趲各官。及汛地文武官。親臨確勘。各出保結。取具運官結狀。該督撫具題。豁免。如運糧官軍。未經漂沒船糧。詐報漂沒。並故將船放失。及雖係漂沒。損失不多。乘機侵盜。至六百石者。照律擬斬。不及六百石者。照律發邊衛。永遠充軍。漕米照數賠補。其沿途催趲各官。及

汎地文武各官。不親臨確勘。遽出保結者。並行革職。該督撫不嚴察確實。遽行題豁。後詐冒事露。將具題督撫降二級調用。○又題準文武官。凡遇漕船沉溺。不將情由申報者。降一級調用。○又題準押運官弁。巡察不謹。以致失火燒燬漕船者。降一級調用。地方官不行協救。延燒別船者。罰俸一年。○二十六年題準漕船失風沉溺。船未抵通。而糧已搭運到通。全完者。坐糧廳呈報戶部。運軍領過行月錢糧。免其追繳。○四十二年奉

旨。洪澤湖水勢更甚於大江黃河之水。這失風漂沒船糧。從寬豁免。嗣後洪澤湖有漂沒船糧。亦照大江黃河漂沒之例議奏。欽此。○雍正元年題準漕船在內河失風。將押運官弁照失於防範例。罰俸一年。仍取其押運官弁。并地方文武官弁。並無假捏印結送部。倘有假捏情弊。即將弁軍嚴加治罪。出結官弁。從重議處。○又題準糧船在裏河漂流者。不准豁免。將該幫進倉米。免其晒颺。以所剩晒颺折耗餘米。抵補漂流之數。如抵補不敷。將該幫羨餘銀扣抵。該幫不足。將該衛羨餘銀。

該總扣除。務足原額。○四年議準。失風漂流之米。除將本幫餘米抵補外。下剩米。限次年搭運抵通。正兌改兌。均照平米收受。仍免其晒颺折耗之米。以示軫恤。○五年題準。漕船入境。地方官不顧風色水勢。催趲前進。在內河致有疎虞。將該管地方官。與押運官弁。均照失於防範例議處。○又題準。船糧在江洋黃河洪澤漂沒。片板粒米無存者。準予豁免。○六年題準。領運弁軍。凡遇海洋大江黃河危險地方。遭風漂沒。幸獲生全者。照軍功保守在事有功之例。官加一

級。運軍照軍功頭等傷例賞給。其漂沒身故者。官不論銜級大小。照軍功陣亡例。俱以見在職任。分別準廕加贈。給與祭葬銀。運軍亦照軍功陣亡例。給與祭葬銀。其無妻子親屬者。照例給銀。該督撫提鎮委官致祭。至船內頭舵水手。被淹身故者。照軍功二等傷例賞給。○十二年議準。海洋大江黃河洞庭洪澤等湖。領運弁軍。被溺身故。照軍功例賞恤贈廕。其在內洋內河。以及停泊海口島嶼等處。修造漕船。雖係奉公差委。與効力疆場者有間。此等幸生之弁軍。應照

軍功例減等官給與紀錄二次。運軍人等照二等傷例減半賞給。其漂沒身故者官照陣亡例各減一等。分別廕贈減半給與祭葬銀。運軍亦照陣亡例減半給與祭葬銀。無妻子親屬收受者仍照例給銀二兩。遣官致祭。再內洋等處遭風溺故之千總量減一等。廕子弟一人以把總補用。○十三年題準漕船歷運五六年及未至五六年而有風火等事之失責令賠造。歷運七八年而有事故責令買補。歷運九年而有事故以及腐朽不堪者責令雇募均至十年限滿準

其給價配造。○乾隆二年咨準漕船凡遇風火事故押運官弁例應即速報明沿河各官協同救護嗣因幫船失事並不知會地方官弁以致藉端卸責嗣後漕船如遇事故務令據實報明。○三年題準漕糧內河失風漂流運軍賠累艱難應交茶果銀槩行免交其糧已漂失臨倉買補無藉經紀車戶轉運者個兒錢一並免交。若船無破損米無虧缺到通轉運進倉者個兒錢照舊交納。○又題準假捏失風希圖挂欠者仍照例議處。若汎水漲發猝不及防失風之船能

岸救修艚抵通糧無虧折或買補全完者領押  
守千丞倅均免議處仍照例議叙倘船非滿號  
不能岸救米有挂欠雖買補全完亦仍照例議  
處至地方文武官弁協同岸救船糧均無虧者  
免其議處如不能協同岸救以致漂流者仍照  
例處分○又題準押運丞倅遇有幫船失風事  
故向例與領運守千一例議處但丞倅統轄十  
餘幫較之守千專管一幫者有間嗣後量為輕  
減原例罰俸三月者改為一月罰俸六月者改  
為三月罰俸一年者改為六月降一級留任者

改為罰俸一年降一級調用者改為降一級留  
任降二級調用者改為降一級調用革職者改  
為降三級調用○四年題準糧船停泊處所他  
船失火該軍在船不即設法開放地方官不行  
星飛往救以致沿燒者將火燬船責令官軍名  
下分賠造運○五年題準漕船遇有事故各失  
防職名照例開送如有應行免議之處於咨內  
聲明聽候吏兵二部察議○又題準副軍有在  
大江黃河被淹身故者照軍功二等傷例賞給  
○六年題準各省出運船糧凡有失風漂流之



米照例報部分別易換扣抵倘有徇隱捏報等弊照例題叅○七年議準糧船失風火燎其船不致被沉者無論已未過淮即令修固原船復載抵通如已被沉難岸者準雇民船載運跟幫過淮盤驗抵通倘過淮時未經雇募將米已分通幫帶運者不許中途再雇民船裝運以杜盜賣攙和之端若過淮後失事或在黃河中流及該地方無民船雇募者仍令先分通幫帶運開行一面前途雇覓民船裝運總著通幫衆丁出具互保各結抵通交納稍有虧缺責令賠補○

十四年議準漕船回次雖交與地方官收管仍著隨幫官弁約束稽察遇有風火事故即將該隨幫職名報叅如新運千總既經接收幫船即將新運千總職名報叅或漕船減存在次遇有事故運隨二弁均不能兼顧即開收管之地方官職名報叅至押運同知等官如遇回空到次後風火事故免其叅處



